

## Акафист всем преподобным Киево-Печерским

### Кондак 1

Богоизбранный полче и личе богокрасный, преподобнии отцы наши Печерстии, чудес многих источницы, иноческаго, постническаго общежития на Руси первоучители и наставницы, сие вам от душевнаго желания дерзаем принести похвальное пение. Вы же, яко имущи велие дерзновение к подвигоположнику Христу Богу нашему, молитесь Ему, молим вы, от всяких бед и зол нам избавитися, да с благодарением зовем вам: Радуйтесь, вси преподобнии отцы наши Печерстии, всемирнии светильницы, великии и преславнии чудотворцы.

### Икос 1

Ангелоподобнаго возжелаете жития, отцы богомудрии, мирския многомятежныя молвы избегосте, в пещерах тесных и темных вселистесь, идеже труды велии и подвиги подъясте, да Христа приобрящете; темже и слышите от немощных нас и грешных сия песнопения: Радуйся, Антоние, воздержания, смирения, послушания и безмолвия зеркало; радуйся, веры православныя крепкое забрало. Радуйся, Феодосие, монашеская похвало; радуйся, обители твоея велелепная славо. Радуйся Михаиле, первый архипастырю наш и учителю; радуйся, веры Христовой усердный насадителю и идолослужения искоренителю. Радуйся, Прохоре, чудотворче всеблаженный, хлебы сущими от былий и солию от пепла, голодом таюция люди пропитавый. Радуйся Иоанне, постом неизреченным просиявый. Радуйтесь, Феодоре и Василие, во временней жизни взаимным любви Христове союзом себе связавшии; радуйтесь, от корыстолюбиваго князя Мстислава крепко пострадавшии. Радуйтесь, яко и по блаженней кончине вашей во единой раце дружелюбно почитаете; радуйтесь, яко во едином часе к престолу Божию предстаете. Радуйтесь, вси преподобнии отцы наши Печерстии; всемирнии светильницы, великии и преславнии чудотворцы.

### Кондак 2

Видя Христос Господь, яко во имя Его снидостесь купножитьствовати, посреде вас обретесь, пособствуя вам в различных подвизах, наипаче же во брани со духи злобы поднебесной, и обогащаше вас благодатию Духа Пресвятаго: одному подавая дар пророчества, другому же дары исцелений, иному власть изгоняти духи нечистии, вы же благодать сию приемши, не

вознесостесь духом своим, но в простоте души и сердца со смирением и благодарением Благодарителю Богу песнь воспесте: Аллилуиа.

## Икос 2

Разум неуклонен имуще и крепкою верою в Бога вооружившеся, пути спасительнаго держастесь, отцы прехвальнии, егоже и совершите преславно с помощью Христа и Пречистой Его Матери; сию помощь и нам, хотящим богоугодному житию вашему подражати, испросите у престола Всевышняго, да благодарно воспоем вам: Радуйся, Поликарпе, главо пресветлая, жития святых конечнее списавый и воедино собравый; радуйся, яко с ними у престола Троицы Пресвятыя представый. Радуйся, Варлааме, уме благодатный, пещеру темную и тесную светлым и пространым палатам предпочтый; радуйся, златотканная одежды на рубы иноческия пременивый. Радуйся, Дамиане, целебниче безмездный, молитвами и святым елеем болящих уврачевавый; радуйся, купножития на небесех с преподобным Феодосием у Господа себе испросивый. Радуйся, Никодиме, в печении хлебов священных тридесат лет потрудивыйся. Радуйся, Лаврентие, в затворе теснейшем многолетно подвизавыйся. Радуйся, Афанасие, дар слез и умиления от Господа получивый. Радуйся, Еразме, за украшение храма Божия Матере палату красоты неизреченная в Небесном Царстве от Христа стяжавый. Радуйся, Луко, заповедей Божиих усердный делателю. Радуйся, Нектарие, послушания неленостный исполнителю. Радуйтесь, вси преподобнии отцы наши Печерстии, всемирнии светильницы, великии и преславнии чудотворцы.

## Кондак 3

Силою и благодатию, данною ти свыше, в животе твоём, Агапите блаженне, болезни различныя врачевавый. Благодать сия и сила тебе и ныне присущая, паче же и умножися. Темже молим тя: исцели наша недуги, уврачуй страсти душевныя и телесныя, да здрави суще душою и телом, воспоем прославльшему тя Христу: Аллилуиа.

## Икос 3

Имуще к вам веру, любовь и усердие, ходатаи будете жизни вечныя, отцы богоприятнии! Ваши бо молитвы многомогущии у престола Божия; сего ради и прибегаем к вам, яко великим помощникам нашим и заступникам, славяще вас сие: Радуйся, Иоанне, яко послушание и по кончине своей проявил еси; радуйся, яко старшему брату свой смертный одр уступил еси.

Радуйся, Феофиле, яко братним послушанием от гнева исцелился еси; радуйся, яко вместо гнева умиление и слезы непрестанныя возымел еси. Радуйся, Кукшо священномучениче, яко язычников множество ко Христовой вере привел еси: радуйся, яко за Христа со учеником твоим во главу усечен был еси. Радуйся, Алексие, молитвы умныя добрый делателю. Радуйся, Григорие, икон святых благоговейный писателю. Радуйся, Савво, чудес великих творителю. Радуйся, Сергие, послушания прехвальный рачителю. Радуйся, Меркурие, житию безплотных поревнователю. Радуйся, Пимене многоболезненный, крепкий на Бога упователю. Радуйтесь, вси преподобнии отцы наши Печерстии, всемирнии светильницы, великии и преславнии чудотворцы.

#### Кондак 4

Бурный и широкий жития мирскаго путь возненавидевше, возлюбисте же вседушно узкую и прискорбную жития монашескаго стезю и сею усердна потекосте, отцы богомудрии; темже и Господь, видя ваше благое произволение, заповеда Ангелом своим споспешествовати вам и укрепляти вас. Сего ради, хотящему всем человеком спастися Христу, поем: Аллилуиа.

#### Икос 4

Слышаще людие, яко Господь прославил святым нетлением телеса ваша и дарова вам благодать целити недуги и болезни, темже притекают к вам движимые верою, с Востока, Запада, Севера и Юга, похваляюще вас приветствии таковыми: Радуйся Несторе, первый Русский бытописателю; радуйся житий святых отцов Печерских сказателю и усердный им во всем подражателю. Радуйся, Евстратие, доблий мучениче и постниче, сообразно самому Христу пострадавший; радуйся, все язвы Господа Иисуса на теле своем понесший. Радуйся, Елладие, затворников похвало. Радуйся, Иеремие, прозорливых славо. Радуйся, Моисее, целомудрия светило. Радуйся, Иоанне, девства победо. Радуйся, Марко, его же честнии руце гробы святым ископаша; радуйся, его же гласа мертвии послушаша. Радуйся, Николо княже, в послушание братии Печерстей всецело себе предавый. Радуйся, Григорие, иже потоплением в реце кончину блаженную приявый, его же тело пречестное в келлии чудесно обретесе. Радуйтесь, вси преподобнии отцы наши Печерстии, всемирнии светильницы, великии и преславнии чудотворцы.

### Кондак 5

Видя Дионисий богомудрый телеса ваша во гробех святолепно почивающа, яже вниде покадити в день Пасхи Христовой, от избытка любви и благоговения к вам воззва: «Святии отцы и братия, ныне есть велик день: Христос воскрес!» И, о чуде! Слышит абие от вас громогласное: «Воистину воскрес!» Дивяшеся чудеси сему преславному, поем воскресшему и пребывающему во век века Христу Богу: Аллилуиа.

### Икос 5

Разумнии звезды небесе пещернаго вы есте, отцы прехвальнии, путь иноческаго жития освещающи и на круге Русския Церкви православныя пресветло блистающи. Слава бо всечестных подвигов ваших во вся мира концы протече, исповедание же святых веры ваша вся Вселенную облиста: того ради и дерзаем приносить вам сия убогия наша пения: Радуйся, Онисиме, яко теснотою затвора пещернаго в пространная селения райския прошел еси; радуйся, яко алчбою и жаждою насыщение бесконечное лицезрения Божия узрел еси. Радуйся, Матфее, яко за чистоту души и тела дара пророческаго сподоблен еси; радуйся, яко кротостию и незлобием высоких добродетелей достигл еси. Радуйся, Исаие, кладезю глубокий смирения; радуйся, источнике неиссякаемый чудотворений. Радуйся, Авраамие, сыне святаго трудолюбия. Радуйся, Нифонте святителю, поборниче Православия. Радуйся, Сильвестре, бисере пречестный. Радуйся, Пимене, сосуде Духа Святаго избранный. Радуйся, Онуфрие, языком молчаливый, умом хваливый Бога. Радуйся, Анатолие, терпеливый душею, разумом целомудренный. Радуйтеся, вси преподобнии отцы наши Печерстии, всемирнии светильницы, великии и преславнии чудотворцы.

### Кондак 6

Проповедницей нам является честная десница твоя, Спиридоне богоприятне, ею же православных чад твоих поучаеши, како персты слагати подобает во изображение креста святаго на челе, уста же расколоучителей заграждаеши, яже обличая их неправо учение о перстосложении; сим бо образом осенив себе крестным знаменiem отошел еси ко Христу, Ему же предстоя молися, да угасит безмерно горящую печь страстей наших, да дарует нам истинное усердие славословити Его непрестанно во псалмех и пениях духовных в сей жизни и в будущей да сподобит нас пети Ему: Аллилуиа.

## Икос 6

Возсия яко пресветлое светило богознаменитая обитель ваша, отцы преподобнии и всю землю Русскую благодатию Божиею просвети: юже кровными поты воздвигосте и на ню же благодать свыше молитвами вашими и святыми подвиги привлекосте, ревнуя бо поревновасте пророчеству, еже рече: «На горах сих возсияет благодать Божия и вера умножится». Темже к вам, яко виновником пророчества онаго зовем: Радуйся, Арефо, яко Господь милость свою на тебе удиви; радуйся, яко Господь украденное богатство твое в милостыню тебе вмени. Радуйся, Феофиле, ему же земля бысть ложем, власяница одеждею. Радуйся, Сисое, ему же бдение бысть сном, слезы успокоением. Радуйся, Алипии, ему же Ангели в трудах святаго иконописания помощники быша. Радуйся, Симоне святителю, его же святии руцы жития святых написаха и нам на пользу душевную предаша. Радуйся, Никоне, Антония первый благоговейный учениче; радуйся, Феодосия в делах монастырских усердный сотрудице и в душеспасительных подвизех рачительный соучастниче. Радуйся, Феофане, яко тело постом умертвил еси. Радуйся, Онисифоре, яко душу бденными молитвами оживил еси. Радуйся, Макарие, яко за жизнь святую истлением тела от Господа почелся еси. Радуйся, Анастасие, диаконе благоговейный и страдальче предивный. Радуйтесь, вси преподобнии отцы наши Печерстии, всемирнии светильницы, великии и преславнии чудотворцы.

## Кондак 7

Хотя преблагий Господь страну нашу благодатию Своей обогатити и дати образ хотящим спастися, подвиже вас Духом Святым на вельми скорбное и богоугодное житие, им же удивисте не токмо человеков на земли, но и Ангелов на небеси: вы бо, о, отцы богоноснии, в пещерах заключившеся, аки во гробех, всеусердно в теплоте сердца и души, Единому Богу поработасте, богокрасно поюще песнь: Аллилуиа.

## Икос 7

Новая жизни иноческа отцами и учителям и явистеся, яже на Руси ниже именовася когда, сию вы насадисте и добре укоренисте. Темже безчисленные множества монашествующих последующе душеспасительным стезям вашим благодарно вам воспевают: Радуйся, Авраамие, яко Христа Господа всею душою и сердцем возлюбил еси; радуйся, яко Его ради и труды велии затвора пещернаго подъял еси. Радуйтесь и вы, дванадесять братьев прекрасни, яко церковь Божия Матере небеси подобную украсили

есте; радуйтесь, яко за труды ваша динарий от Сына Ея Христа Бога, Царство Небесное восприяли есте. Радуйся, Исаакие, яко премногими страданиями диавольскую прелесть низложил еси. Радуйся, Илие, яко воздержания подвиги и безстрастия благодатию обогатился еси. Радуйся младенче мучениче Иоанне, яко кровь твою святую неповинно за Христа пролиал еси; радуйся, Никоне, яко на кресте простершему волею длани Христу терпением и незлобием вельми угодил еси. Радуйся святителю Ефреме, яко пчела сот пресладок, тако ты Устав студийский в обитель Печерскую принесл еси. Радуйся, Тите блаженне, яко гневнаго беса смирением попрали еси; радуйся, яко тьму лукавых демонов далече от нас прогоняеши. Радуйся, яко свет, еже не гневаться на ближняго, собою нам проливаеши. Радуйтесь, вси преподобнии отцы наши Печерстии, всемирнии светильницы, великии и преславнии чудотворцы.

### Кондак 8

Странное и преславное чудо благодати небесныя проявися воочию всех верных: пещера разбойников в храм Божий соделася: идеже бо грех преизобилова, тамо благодать приумножися, идеже терн беззакония укоренися, тамо кедры рая Христова возрасташа, идеже блато смрадное греха бяше, тамо источники бессмертия воскипеша, идеже смерть обладаше, тамо Господь воцарися. Дивящися изменению десницы Вышняго, зовем: Аллилуиа.

### Икос 8

Все ваше, преблаженные отцы, тщание, желание и попечение бяше, да всезлобному рода христианскаго врагу гордую главу попрали и сотрети, Господа же Иисуса Христа в душах и телесах ваших да возвеличите и прославите; сего ради приветствуем и вас сице: Радуйся, священномучениче Лукиане, яко уготовася тебе небесное жилище; радуйся, яко страдальцу, даровася тебе нескончаемое райское покоеще. Радуйся, Лаврентие, яко суеты мирския избегл еси; радуйся, яко к общежитию с миром ангельским востекл еси. Радуйся, Пафнутие, яко, помня час смертный, непрестанно слезил еси; радуйся, яко при кончине от Ангелов утешения сподобился еси. Радуйся, Мартирие, яко за великую чистоту и постнические подвиги дара целити болезни сподоблен был еси. Радуйся, иерарше Иларионе, яко стадо словесных овец Христовых на пажитех Православия добре упасл еси. Радуйся, княже Феодоре, яко в честь и во славу Церкви православной много потрудился еси. Радуйся, Дионисие, яко «воистину воскрес Господь» от преподобных отцев в день Пасхи услышал еси. Радуйся, Афанасие, яко

красная мира сего презрев, блату вменил еси. Радуйся, святителю Феофиле, пастырю добрый, яко за пасомых тобою и живот положити готов был еси. Радуйтесь, вси преподобнии отцы наши Печерстии, всемирнии светильницы, великии и преславнии чудотворцы.

### Кондак 9

Всем есте вся, отцы преподобнии, небесная бо врачества предлагаете нам и к безмездным лечбам своим вся ны созываете, не хитростями человеческими, ни обязаньми, но действием Святаго Духа душевныя и телесныя исцеления преестественне подаете, еже приемлюще обильно, род всяк и возраст Благодателю и Промыслителю зовет благодарно: Аллилуиа.

### Икос 9

Витии многовещанныи риторскими своими языки не возмогут достойно воспевати ваша святыни, тем паче аз убогий словом и разумом, киими песньми восхваляю вас, о отцы, Ангелом равночестнии, обаче побужден усердием и любовию яже к вам, дерзаю венчати вас сими недостойными моими похвалами: Радуйся, Зиноне, постом и многими иными подвиги иноческаго жития светло просиявый; радуйся, смирением, кротостию и послушанием землю кротких наследивый. Радуйся, Григорие, яко зелием, им же питался, здравие болящим преподавый. Радуйся, Ипатие, святым отцем в болезнях со всеусердием послуживый и за сия благодать Духа исцеляти недуги восприявый. Радуйтесь, отцы преподобнии, их же пречестнии главы во здравие душ и телес наших миро источают; радуйтесь, их же пресвятии души в неизреченной славе Божию престолу предстоят. Радуйся, Моисее, яко молитвами, постом и веригами страсти умертвил еси. Радуйся, Иосифе, яко вратами смиренного и усерднаго послушания в вечный покой вшел еси. Радуйся, Павле, яко николиже в праздности времени препроводил еси, темже со труждающимися и обремененными водворился еси. Радуйся, Сисое, яко чрезмерными подвигами постничества не токмо человека, но и Ангелов удивил еси. Радуйтесь, Леонтие и Геронтие, яко из младенчества Христа возлюбили есте; радуйтесь, яко во отрочестве в подвизех наставником соражнялись есте. Радуйтесь, вси преподобнии отцы наши Печерстии, всемирнии светильницы, великии и преславнии чудотворцы.

### Кондак 10

Спасти хотя многих, всех обращения и спасения милостивно ищай

премилосердный Христос Бог наш, других вас отцев Египта, Фиваиды и Палестины, — Руси прояви, да вами многих вразумит и покажет вашим житием путь ко спасению, в чем вы потруждаеся, добре преуспеете, в неведении сущих Евангельстей истине неленостно поучая, к правоверию приведосте и к хранению Божиих заповедей и богоугодному и чистому житию словом и делом непрестанно возбуждасте, Богу Помощнику песнь поюще: Аллилуиа.

### Икос 10

Стеною твердою и ограждением крепким будете нам, всехвальнии отцы, с теплою верою, усердием и любовью к вам прибегающим, ограждающе нас противу чувственных и мысленных врагов наших, да не убоимся их, но да побеждаим тии молитвами вашими ко Христу Богу, зовуще с благодарением к вам сице: Радуйся, Несторе, нижняя презревый, вышняя же возлюбивый; радуйся, яко пред кончиною самого Господа Иисуса Христа со Ангелы видети сподобивыйся. Радуйся, Феодоре, яко хранение устом своим положил еси. Радуйся, Памво исповедниче, боги языческия проклявый, имя же Господа небесе и земли исповедавый. Радуйся, Софроние, затвором крепким и железом тело стеснивый, душею же и умом со псалмопением к небеси непрестанно паривый. Радуйся, Панкратие, яко болящим благодатию Духа Святаго исцеления источаеши. Радуйся, Антоние, яко духи лукавыя от приходящих к тебе с верою проганяеши. Радуйся, Мардарие, нищеты и нестяжания любителю. Радуйся, Аммоне, древним отцем святым в подвизех всеусердный подражателю. Радуйся, Пиоре, страсти телесныя огнем воздержания попаливый. Радуйся, Мартирие, добродетельным нравом душу просветивый. Радуйся Руфе, во образ житием своим постникам и подвижникам бывый. Радуйтесь, вси преподобнии отцы наши Печерстии, всемирнии светильницы, великии и преславнии чудотворцы.

### Кондак 11

Пение всякое хвалебное побеждается множеством преславных ваших подвигов и трудов чрезмерных, превосходящих житие человеческое, но ангельскому подобное: и похвалам от Ангел паче, а не от человек вам приносимым быти достояше, обаче усердное наше видяще произволение, с верою и любовью приносимое нами примите пение и испросите нам оставление грехов, и да в добром исправлении и покаянии скончаем временное сие житие наше, в вечном же да сподобимся молитвами вашими пети Богу: Аллилуиа.



## Икос 11

Свет вам незаходимый возсия возненавидевшим страстей тьму, угодницы Божии преславнии: веселие же нескончаемое восприя вас, добрый подвиг со тщанием скончавшим. Темже предстояще престолу Христову, поминайте нас поющих вам сия: Радуйся, Евфросиние, горняго Иерусалима дщи пречестная; радуйся, дольняго Иерусалима, нашею града Киева, мати пресветлая. Радуйся, Иулиане, дево, лилие прекрасная, произростшая в земном Христовом саде; радуйся, процветшая в небесном Его вертограде. Радуйся, Макарие священномучениче, яко до смерти верен пастырь был еси; радуйся, яко прежде, неже прияти ти престол на земли чувственный, на престолы мысленные предпослался еси. Радуйся, Кассиане, затворниче дивный. Радуйся, Арсение, яко за богоугодные временные, вечно от Христа упокоен еси. Радуйся, Евфимие, яко пощения ради твоего великаго и немолчнаго славословия Богу, райских сладостей насыщаешься и со Ангелы поеши. Радуйся, Вениамине, яко раздав имения твоя, на лоне Авраама почиваеши. Радуйся, Тите, яко земнаго царя воинство оставль, да Небесному Царю храбрейший воин будеши. Радуйся, Ахило, яко от юности распялся еси житию и страstem, да распеншагося волею на кресте Христа приобрящеши. Радуйтесь, вси преподобнии отцы наши Печерстии, всемирнии светильницы, великии и преславнии чудотворцы.

## Кондак 12

Благодатию Всемиловитоваго и Всещедраго Бога житием равноангельным пожисте, отцы духоноснии, чудеса многи содеясте, храм Пречистой Госпоже Деве Богородице пречуден создасте и яко невесту прекрасну златом, серебром и камением многоценным украсисте, в онъ же людие от всея Вселенныя приходяще, восхваляют о вас Христа Бога, поюще Ему: Аллилуиа.

## Икос 12

Поюще ваше безмолвное житие, похваляем подвиги ваша — пост, молитвы, слезы, коленопреклонения, всенощныя бдения, плоти умервщления, духа сокрушение, долулегания, смирение, кротость, молчание, терпение, нищету, нестяжание и вся та чтим, яже любви ради Христовы подъясте, тако воспевающе: Радуйтесь, Паисие и Меркурие, яко в неразлучней жизни и единоклюней любви братской пожисте на земли; радуйтесь, яко единою жизнью и радостью вкупе наслаждаетесь со Христом и на небеси. Радуйся, Макарие, яко Самуил в юном возрасте в служение

Господу предназначен был еси. Радуйся, Пимене, яко пшеница гумна Христова, в житницы небесныя предопределен еси. Радуйся, Силуане, яко на крилех поста и молитвы к Богу возлетел еси. Радуйся, Агафоне, яко на плещех добродетелей высоких в горныя подъят еси. Радуйся, Захарие, яко бесом страшен был еси, Ангелом же собеседник явился еси, с ними же и ко престолу Троицы Пресвятыя воспарил еси. Радуйся, Игнатие, княже пресветлый пещерного града; радуйся, пастырю преподобный богоизбранного стада. Радуйся, мучениче младенче, яко за Христа от Ирода бесчеловечного чашу смерти испивый; радуйся, землю Востока кровию освятивый и нашу страну пришествием твоим благословивый. Радуйся, Лонгине, яко путем узким право шествовал еси, им же и рая Божия доспел еси. Радуйтесь, вси преподобнии отцы наши Печерстии, всемирнии светильницы, великии и преславнии чудотворцы.

### Кондак 13

О Всеблаженнии и всяких похвалений превышнии, преподобнии отцы наши Печерстии, примите сие малое вам приношение, якоже и Господь прият две лепты вдовицы: и не возгнушайтесь молением нашим, яко и Христос не возгнушался лобзания блудницы, и сподобите нас ходатайством вашим ко Господу в добром исправлении и покаянии скончати житие сие и с молитвою во устех, в сердце и душе отыти от сея временныя жизни к вечней, и предстати престолу Всевышняго, идеже вы предстоите и со Архангелы и Ангелы и со всеми святыми, песнь поюще: Аллилуиа.

(Этот кондак читается трижды)

### Молитва первая

Преподобнии и богоноснии отцы наши Антоние и Феодосие, и вси преподобнии Печерстии, светила земная пресветлая, от темных мест пещерных в земли Русской славно просиявшии, и сию многими светозарными ангелонравного вашего жития звездами онебесившии, всю же Вселенную высоких добродетелей светлостями и чудес божественных блистаньями удивившии, и ныне смертным западом плотски на время во гроб зашедше, душами со Христом Солнцем Правды, суще праведницы просвещаетесь, яко солнце во Царствии Небеснем: идеже молитвенная ваша к Богу Свету лучи о Отечестве своем простирающе, не забудьте и нас, всегдашняя своя молитвенники, в нощи страстей и скорбей пребывающия, свыше благодатными приизрати осиянии; яко да во свете добродетельного вашего жития право ходяще, сподобимся зрети свет неприкосновенныя славы Божия, хваляще Его купно с вами в нескончаемыя веки.

Аминь.

## Молитва вторая

О угодницы Христовы, преподобнии отцы наши Антоние и Феодосие и вси святии Киево-Печерстии, светильницы пресветлые, святостию иноческаго жития первые просиявшие на земле Российстей, покровители града Киева и всего отечества нашего! К вам, молитвенникам теплым и предстателям непостыдным, усердно притекаем, в нуждах и скорбях наших утешения и помощи просяще. Помозите нам, рабам Божиим (имена), заступницы наши! Утвердите нас в вере святей, сохраните Церковь Божию от пагубных ересей и расколов, научите нас всегда творити заповеди Божия и вся предания церковная, от отец нам заповеданная, будите нам благосердые отцы и теплые молитвенницы, яко да прославим имя Живоначальныя Троицы, Отца и Сына и Святаго Духа во веки. Аминь.